

REGIONAL NEWS

HEADLINES:-

1. Chief Minister Pu Lalduhawma chuan thlai thar pali thlan bik chu sorkarin a lei ngei ngei dawn niin a sawi.
2. Mizoram chungah dam loh thila Golden Card hmang thei mi nuai 5, sing 6, sang 1 leh 470 an awm mek.
3. West Bengal New Jalpaiguri kianga rel chesualah mi 8 an thi a, midang 50 an hliam.
4. Vawiin tlai khan Union Home Minister Amit Shah-a kaihhruai thuneitu sang thukhawm chuan Manipur buaina chungchang New Delhi-ah an sawiho.

<><><>

CASH CROP MARKET

Chief Minister Pu Lalduhawma chuan ZPM sorkar flagship programme thlai thar pali thlan bik lei chu an tihlawhtling ngei ngei dawn niin a sawi.

Vawiin khan Chief Minister Pu Lalduhoma ho hian a pisa-ah Sawhthing lei leh hralh leh a sawngbawl chungchang Minister leh official pawimawh te'n an sawiho a. Chief Minister chuan tun atanga thla 6 velah heng thlai 4-te hi a thar chho mai tawh dawn niin a sawi a. Chumi hre reng chuan tih tur awm apiang an lo tih ve zung zung a tul a, chak taka inbuatsaih theuh turin mawhphurtute a chah a. Kuhva chingtute harsatna pawh thapui thawha an bawhzui a tul tih a tarlang bawk. Kum tharah hian Mizoramin sawhthing quintal maktaduai 1 vel a thar chhuak tura ngaih a ni a. Free market (a duh duhin lei theih tura ruahmanna) hmangin lei leh hralh hi kalpui zel tur a ni dawn a. Amaherawh chu market a kal tluan theih na'n leh loneituten an tharchhuah zawng zawng an hralh theih nana thil tul te vawiin khan an sawi a ni. Sawhthing Minimum Support Price hi January atanga May thla inkarah pek ni se tiin thutlukna an siam bawk.

Thutkhawmna a kalte hian sawhthing hi a hralhna kal tluang (free market) pangngaia loneitute'n an hralh theih bak a grade hniam, process ngai chi lo awm ta se engtia kalpui tur nge ni ang tih an sawi nghal a, hemi atana Private company rintlak te thawhpui dan turte an rel a. Kuhva chingtute harsatna sutkian dan tur, Mizoram chhunga processing plant siam chungchang te pawh an sawi.

Inkhawmah hian Agriculture Minister Pu PC Vanlalruata, Horticulture Minister Prof. Lalnilawma, Commerce & Industries Minister Pu F. Rodingiana, Adviser to CM Dr. KC Lalmalsawmzauva leh Secretary to CM Pu Vanlaldina Fanai, bakah official pawimawh te an tel a ni.

<><><>

WALKATHON

Health Minister Pi Lalrinpui chuan Mizoramin India rama pakhatna dinhmun a chelhna hrang hrang - HIV kai zat, cancer natna vei zat leh zuk leh hmuam ti zat te chu a chhuanawm lo hle a ni a ti.

Vawiina World No Tobacco Day puala Millennium Centre leh Vanapa Hall inkara zuk leh hmuam dona kawngzawh, Walkathon a hmanpuinaah he thu hi Minister chuan a sawi a. Vawiin World No Tobacco Day chu zuk leh hmuam ti thinten simna ni atana an hman a a duhsak thu a sawi a, a la ti lo te ti thar lo tura intiam theuh turin sawm bawk a ni.

World No Tobacco Day puala hun hman hi NHM Mission Director Dr. Eric Zomawian kaihruaiin zuk leh hmuam ti lo tura intiamna hun a hmanpui a. Vanapa Hall kawtah kharna programme tawi hman a ni. World No Tobacco Day pual walkathon hi National Health Mission, National Tobacco Control Programme (NTCP) leh Comprehensive Primary Health Care (CPHC) tangkawpin an buatsaih a ni.

<><><>

GOLDEN CARD

Mizoram chhungah dam loh thila Golden Card hmang thei mi nuai 5, sing 6, sang 1 leh 470 an awm mek.

Thudawn danin Golden Card nei chhungkaw nuai 1, sing 9, sang 7 leh 334 an awm a. Golden Card nei zinga mi 17, 241 te chuan tangkai taka hmang tawhin, mi 28,003 atangin bill a lut tawh bawk a ni. Golden card hmang tamna ber district chu Aizawl niin, Champhai-in a dawt a, Siaha district chu Golden card neih tlemna niin mi 27,688 in an nei bawk a ni. Golden card hi siam hun chhung bituk a awm hran lo a, sorkar damdawi-in zawng zawngah siam tir theih niin, Mizoram State Health Care Society Office, Dinthar leh Common Service Centre-ah siamtir theih a ni bawk a ni. Golden Card nei tur hian NFSA (ration card eng leh pawl nei) chhungkua, National Health Authority (NHA data lut chinte) chuan golden card hi an nei thei a. Socio economic caste census (SECC) 2011 deprived list leh RSBY 2018 list a chuang zinga chhungkaw member pakhat talin golden card an lo siam tawh a nih chuan Golden Card nei thei chhungkua-ah chhiarzawm an ni bawk a ni.

<><><>

GOODS SHORTAGE

June ni 8-a Myanmar sipaite'n Tahan khawpui leh Zokhawthar insumdawna kawngpui a Run lei an bomb chhiat avangin Myanmar bungrua a vang a, a man a to hle bawk.

Zokhawthar khawtlang hruaitute'n an sawi danin Myanmar sipaite'n Tahan, Tedim leh Zokhawthar inkara Run lui chung a lei dawh an bomb chhiat avangin helai kawngah hian bungrua phurh tlang theih a ni lova. Kawng hla zawk Falam lam atangin bungrua a lo thleng tawh tho na-in a lo thlen har avang leh a phurh man a to avangin eichawp leh in tur lam chite bakah electronic bungruate chu a man a sang hle a. Ramri hrula chengte tan harsatna a siam mek a ni. Bungrua hi a thlen tlai bakah a hma ai chuan a thleng tlem hrim hrim a, a phurhna kawng a kual avangin a phurh man a to a, chu chuang bungraw man hi a tito niin khawtlang hruaitute chuan an sawi a ni.

Myanmar ram atanga Mizorama thil chi hrang hrang tam ber lakuhna Kalaymyo khawpui a Tahan khua hi Mizo tawng hmang tamna khawpui a ni a. Tam tak hi kum 1948-a British sorkar atanga Burma-in zalenna a hmuh hlim leh a hnu lama Mizoram atanga pem chhote an ni a. Tahan khawpui a chengte hi za zela 99 zet chu Kristian an ni a. Myanmar ram pumpui a cheng za zela 90 chu Buddhist an ni thung.

<><><>

ASF

Vawiinah African Swine Fever (ASF) vei vawk 78 a thih belh leh avangin Mizoram puma he vawk pulhri leng avanga kumina vawk thi zat chu 2,257 a tling ta.

Animal Husbandry and Veterinary department hotute'n an sawi danin ASF vawk pulhri darh zel tur venna atan vawiin khan vawk 30 tihlum a ni bawk a. Kumina vawk pulhri darh tur venna atana vawk tihlum tawh zawng zawng hi 4,672 a tling tawh a ni. Vawiina vawk thite hi Aizawl, Saitual, Khawzawl, Serchhip leh Kolasib a thite a ni a. Aizawl district-a Falkawn khua-ah vawk 44 lai a thi a, Serchhip district a Baktawng khua-ah 10 a thi bawk. Vawiina vawk suatte hi Serchhip leh Aizawl district-a khaw pali amite a ni a. Nimina vawk 98 zet an suatna, Chhingchhip khua-ah hian vawiinah vawk 23 zet an suat leh a ni.

<><><>

REFUGEES

Nimin khan Lawngtlai district a Vathuampui khua-ah Bangladesh-a Chittagong Hill Tracts atangin raltlan 29 an lo luh belh.

Lawngtlai a kan Corr Lalngheta Ralte sawi danin raltlan 29-te hi chhungkaw 9 ami an ni a. Puitling 16 leh naupang 13 an ni. Vathuampui khua bikah hian Bangladesh raltlan mi 390 an awm mek a ni. Heti hian Lawngtlai district-a sahimna zawnga Bangladesh atanga raltlan awm zat chu 1,901 an tling ta a ni. An zinga engemawzat hi Lawngtlai district-a relief camp 12-ah awmin a dangte chu khaw 11-a an

chhungte leh thiante belin an awm a ni. Bangladesh atanga raltlan rawn lutte hi Bawm hnam an ni ber a, anmahni chuan Kuki-Chin an inti a. Kuki-Chin National Army (KNA)-in Chittagong Hill Tracts-a an chenna hmuna thuneihna sang zawk an ngiat avangin Bangladesh sipaite nen an inkap deuh reng a, chumi vanga rawn raltlan an ni.

Lawngtlai district-a Bangladesh atanga raltlan 1,901 bakah Myanmar atanga raltlan 5922 nen an vaiin raltan 7823 Lawngtlai District ah an awm mek a ni.

<><><>

UNION MOS

NDA sorkar thara Minister of State for Home Affairs a lak luh tak Bandi Sanjay Kumar chuan naktuk hian Kolasib a tlawh ang.

Naktuk hian Prime Minister Narendra Modi chuan PM-Kisan hnuai a kuthnathawktute hnenah installment 17-na atan cheng vaibelchhe 20,000 a sem chhuak dawn a. Prime Minister-in PM-Kisan dawngtu kuthnathawktu mi vaibelchhe 9 leh nuai 26 hnenah pawisa a semna hun hi Uttar Pradesh a Varanasi khawpui a huaihawt tur a ni a. Union Ministry of Agruculture and Farmers Welfare leh Uttar Pradesh sorkar buatsaih tur a ni a. Bandi Sanjay Kumar hian Kolasib KVK hmunah he hun hi a lo hmanpui ve dawn a ni. Hei bakah hian Kumar hian loneitute leh sorkar official-te a kawm bawk ang a. Krishi Sakhis certificate a sem nghal bawk ang.

<><><>

HOUSE COLLAPSE

Mamit Hmar veng Branch YMA te chu Inrinni zinga Pu Hmangaihzuala In tlu senghawiin tukin khan an hnatlang.

Pu Hmangaihzuala In hi Assam type niin, Pu Vanlalpeka luah lai a ni a. Inrinni zing dar 6 vel khan a tlu a. Pu Vanlalpeka hi ram lama hnathawka a awm lai a nih avangin mihring thi leh hliam an awm lo a ni. Tukin khan YMA member-te chu an hnatlangin In chim hmanrua zawng zawng an thiat a, hmun him lamah dah fel a ni.

<><><>

WEST BENGAL: AT LEAST 8 PEOPLE INCLUDING 3 RAILWAYS OFFICIALS KILLED / PM ANNOUNCE EX-GRATIA OF RS.2 LAKH

Tukina West Bengal New Jalpaiguri kianga rel chesualah mi 8 an thi a, midang 50 an hliam.

Rel chesual hi New Jalpaiguri station kiangah bungraw phur rel chuan a su a, hemi hnu hian Kanchanjunga Express rel pindante chuan a kawng a zawh sual ta a ni.

Railway thuneitute sawi danin bungraw phur rel hian signal dawng sualin Kanchanjunga Express chu a hnung lamah a su bur a ni. NDRF Divisional team leh ambulance 15-in chetsualna hmun hi an pan nghal a. Chhanchhuah hna hi thawh zawh tawh a ni.

Prime Minister Narendra Modi-a chuan West Bengal-a rel chesual chu pawia tih thu a sawi a. Rel chesuala thite chu zangnadawmna cheng nuai 2 theuh pek an nih tur thu leh hliamte chu cheng sing 5 theuh pek an nih tur thu a puang nghal a ni.

Railways Minister Ashwini Vaishnaw pawhin rel chesuala thite chu zangnadawmna cheng nuai 10 pek an nih tur thu leh hliam na zual hnenah cheng nuai 2 sing 5 bakah hliam tenau deuh tuarte hnenah cheng sing 5 pek a nih tur thu a sawi bawk.

<><><>

CONGRESS CRITICIZES GOVT OVER RAILWAY MISMANAGEMENT, CALLS FOR IMMEDIATE COMPENSATION AFTER WEST BENGAL ACCIDENT

Congress chuan Railways kalphung enkawl thiam lovah sawrkar a puh.

Congress President Mallikarjun Kharge-a chuan Sawrkar Laipui chu kum 10 kalta chhunga Railway Ministry enkawl thiamlo leh nuam tawlna'a hmangah a puh a. Vantlang auhmuna a sawi danin West Bengal-a rel chesual chu pawl a tih thu a sawi a. Mi tam takin nunna an chan a, mi tam tak an hliam leh ta a ni a ti a. Thi chhungte a tawrhpuil thu sawiin hliamte chu tha chhuak leh thuai se a duh thu a sawi a. Rel chesual tuartute chu a pumhluma zangnadawmna pek a phut thu a sawi bawk.

<><><>

UNION HOME MINISTER AMIT SHAH REVIEW SECURITY SITUATION IN MANIPUR THIS EVENING

Union Home Minister, Cooperation Minister ni bawk Amit Shah chuan Manipur buaina chungchanga thuneitu sang thutkhawm chu New Delhi-ah vawiin tlai dar 4 khan a kaihruai a.

He thutkhawmah hian Sawrkar laipui leh state sawrkara mi pawimawh bakah Sipai leh Security Force-te pawh an tel a ni.

He chanchin buatsaih lai hian thutkhawma an thusawite hriat theih a la ni lo a ni.

<><><>